

四庫全書

集部

欽定四庫全書

集部

皇朝文紀卷二

詳校官庶吉士臣謝恭銘

主事銜臣徐以坤覆勘

總校官知縣臣繆琪

校對官中書臣朱炳

謄錄監生臣曹錫爵

欽定四庫全書

集部八

皇霸文紀目錄

總集類

卷一

神農氏

軒轅氏

高陽氏

女皇氏

陶唐氏

有虞氏

卷二

夏

商

周

卷三

周二

卷四

周三

卷五

魯

齊

紀

卷六

晉

鄭

自少田月ノ一

日録

宋

許

衛

卷七

衛二

卷八

吳

越

楚

卷九

燕

代

卷十

趙

魏

田齊

卷十一

秦

卷十二

秦二

卷十三

左國國策

附

臣等謹案皇霸文紀十三卷明梅鼎祚編鼎祚字禹金宣城人嘗輯陳隋以前之文為文



紀以配馮惟訥詩紀此編上起古初下迄于  
秦故曰皇霸文紀乃其書之第一集也洪荒  
以降書契莫詳事尚無徵况其文字傳於後  
者非漢代緯書之依託即戰國諸子之寓言  
一槩裒存遂不免一真百偽至集古錄博古  
圖考古圖所列諸銘名姓時代半屬臆求點  
畫偏旁多緣附會劉楊異釋薛鄭殊音而確  
定為其商其周編之簡牘實為失于闕疑甚

至籀磬銘六十三字惟錄篆文尤乖體例他  
如穆天子傳詩序之類本各自為書亦登文  
集則錄所不當錄屈原楚詞惟載三篇則刪  
所不當刪何致之偽岫嶼碑楊慎之偽石鼓  
文益出近代漫無考證大橫庚庚之兆且以  
漢文誤入之皆輯錄之踈不可據為典要然  
網羅繁富周秦以前之作莫備于斯蕪穢之  
中菁英不乏陸機所謂雖榛楛之勿剪亦蒙

葺于集翠者也故病其濫而終取其博焉乾  
隆四十五年二月恭校上

總纂官臣紀昀陸錫熊臣孫士毅

總校官臣陸費墀



欽定四庫全書

皇霸文紀卷一

明梅鼎祚編

神農氏

炎帝

少典之子育于姜水以姜為姓又云國伊耆號伊耆氏又號烈山氏都于陳河神部云姓伊耆

名執一曰石年在位百四十五載

伊耆氏蜡祝辭

禮記郊特牲曰天子大蜡八伊耆氏始為蜡蜡也者索也歲十二月

合聚萬物而索饗之也注云報成功于歲終又

以祈來年之始故祝之之辭如此○炎帝神農

氏其初國伊耆國者合而稱之故又號曰伊耆

氏鼎按孔穎達正義云明堂位土鼓鞀為伊耆

氏之樂熊氏云伊耆氏即神農也鄭玄注云伊耆古天子號亦不言神農至陸德明音釋或曰堯也今博士家習禮者從之而玄注先嗇若神農者司嗇后稷正義以神農既始蜡豈自祭其身以為先嗇引皇氏云神農伊耆一代總號其子孫為天子者始為蜡祭祭其先祖造田者故有先嗇也劉勰文心雕龍謂上皇祝文則因指神農矣愚臆謂蜡始伊耆辭不必其時出當是周漢間所傳用如繁露之求雨大卜之被龜耳故蔡邕獨斷止載云天子蜡而不言為神農為堯○劉勰文心雕龍云昔伊祁氏始蜡以祭八神上皇祝文及在茲矣舜之祠田利民之志頗形于言矣

土反其宅水歸其壑昆蟲毋作草木歸其澤

宅叶遠各反澤叶遠

反谷

土反其宅水歸其壑昆蟲毋作豐年若土歲取千百

蔡邕

斷獨

軒轅氏

神農軒轅並從蔡邕獨斷世紀帝居軒轅之邱  
因以為名又以為號一云國於有熊號有熊氏

左傳亦曰帝鴻氏○春秋元

命苞禪通紀先自有軒轅氏

黃帝

初姓公孫名荼又名軒字玄律史記名軒轅繼  
少典氏之國長於姬水更為姬姓邑于涿鹿之

阿一云都彭城在位七十年乃少

典氏後代也史直作少典之子非

金人器銘

皇覽記引太公陰謀黃帝金人器銘云  
武王問尚父曰五帝之戒可得聞乎尚

父曰黃帝之戒曰吾之居民上也搖搖恐夕不至朝故為金人三封其口曰○因學紀聞云漢藝文志黃帝銘六篇皇覽撰于魏文帝時漢七畧書猶存金人銘蓋六篇之一也鼎素孔子家語及劉向說苑並載為周廟器是在魏前文心雕龍以為周公今兩存之楊用脩古雋作五帝

銘

古之慎言人也戒之哉無多言無多事多言多敗多事多害安樂必戒無行所悔勿謂何傷其禍將長勿謂何害其禍將大勿謂不聞神將伺人焔焔不滅炎炎若何涓涓不塞終成江河綿綿不絕或成網羅豪末不札也



將尋斧柯誠能慎之福之根也曰是何傷禍之門也強  
梁者不得其死好勝者必遇其敵盜憎主人民怨其上  
君子知天下之不可上也故下之知衆人之不可先也  
故後之溫恭慎德使人慕之執雌持下人莫踰之人皆  
趨彼我獨守此人皆惑之我獨不徙內藏乃智不示人  
技我雖尊高人弗我害惟能於此也江海雖左長於百  
川以其卑也天道無親常與善人戒之哉

首句一  
有我字

巾几銘

蔡邕銘論云黃帝有巾几之法孔甲  
有盤孟之戒漢藝文志黃帝銘六篇

無掘壑而附邱無舍本而治末日中必萋操刀必割執  
斧必伐日中不蕪是謂失時操刀不割是謂失利執斧  
不伐賊人將來涓涓不塞將為江河熒熒不救炎炎柰

何兩葉不去將用斧柯

利音梨來叶陵之反○楊用脩云此銘漢以下文人多引用不

見其全惟見於兵書如此  
○涓涓六句見前銘小異

### 巾几銘

予居民上搖搖恐夕不至朝惕惕恐朝不及夕兢兢慄  
慄日慎一日人莫躡于山而躡于堙

叶徒吉反○兢兢以下淮南子作堯

戒小  
異

巾几銘

路史

毋弇弱毋肥德毋違同母教禮毋謀非德毋犯非義

金華鼎銘

金華山黃帝作一鼎高一丈三尺大如十石甕像龍騰雲百神蟠獸滿其中腹

篆書三足  
其文曰

真金作鼎百神率伏

虞荔  
鼎錄

丹書

路史黃帝天下已治百令具舉猶且邛然神藥形如用作戒于丹書故作巾几之銘又著

瑞書乃命史甲盤杆邊豆盃鏡矧履與席巾杖戶牖一著銘詩以彌縫其闕注云几二十六篇

昔周公述之于成王並見大戴禮祭豳銘論漢志孔甲盤孟二十六篇○鼎按大戴禮尚父述丹書于武王王退而為戒書注援周公述于成王而以戒銘為孔甲所作猶異當以大戴禮為正

施舍在心平不幸乃弗聞過禍福在所密存亡在所用  
下匿其私用試其上上操度量以割其下上一日百  
戰

瑞書

此即大戴禮尚父述于武王為黃帝丹書者也

敬勝怠者吉怠勝敬者滅義勝欲者從欲勝義者凶凡

事不彊則枉不敬則不正枉者滅廢敬者萬世

禁重教

路史黃帝處中央而政四國分八節以紀農功命天中建皇極乃下教

聲禁重色禁重香禁重味禁重室禁重

命嫖母辭

呂氏春秋遇合篇人之於色也無不知說美者而美者未必遇也故嫖母執乎

黃帝黃帝曰○嫖母貌惡德克為黃帝次妃

屬女德而弗忘與女正而弗衰雖惡奚傷

言教屬女以婦德而不忘

夫付與女以內政而

不衰故雖醜何傷

誨顓頊

呂氏春秋云維秦八年歲在涖灘秋甲子朔朔之日良人請問十二紀文信侯曰嘗

得學黃帝之所  
以海顛頊矣

爰有大圜在上大矩在下汝能灋之為民父母

錄圖文

河圖提輔佐黃帝游於河洛至澤鴻之泉有大鱸魚負圖以授帝蘭葉朱文名曰錄

圖〇一

作錄圖

渾渾鳴鳴棼棼雉雉與物俱化

此錄圖  
中文也

黃帝世識言

竹書  
紀年

西北為王期在甲子昌制命發行誅旦行道

沈約宋書  
符瑞志引

載云及周公劉之後十三世而生李歷  
李歷生文王昌昌生武王發周公旦

有焱氏頌

莊子天運篇云北門成問於黃帝曰帝張咸池之樂於洞庭之野吾始聞之懼復聞之忘卒聞

之惑蕩蕩默默乃不自得帝曰天機不張而五官皆備此之謂天樂無言而心說故有焱氏為之頌乃無聲之

樂樂之至也○鼎案陳士元荒史云莊子稱有焱氏有泰氏路史著論於禪通紀柏皇之下世次莫覈則猶以

有其人矣莊多寓言焉問其人與世也此與天元冊文皆是擬撰並託黃帝故附其末○焱音衍

聽之不聞其聲視之不見其形充滿天地苞裹六極

太始天元冊文

素問天元紀云黃帝問鬼臾區曰願聞五運之主時也何如鬼臾區曰五氣運行各

終暮歲非獨主時也臣積考太始天元冊文○注云此太古占候靈文洎乎伏羲之時已錫諸玉版命曰策文鬼臾區十世祖始誦而行之○宋王應麟云古詩之體始於此然伊川謂素問出於戰國之末鼎謂非也古文

多韻語即周易  
且然不必為詩

太虛廖廓肇基化元萬物資始五運終天布氣真靈總統坤元  
九星懸郎七曜周旋曰陰曰陽曰柔曰剛幽顯既位寒暑弛張  
生生化化品物咸章

倉頡

世本云沮誦倉頡為黃帝左右史世紀云黃帝史官生而能書初制文字春秋元命包作倉帝史皇氏名頡姓

侯罔侈哆四目靈光次在禪通紀伏羲之前春秋命歷序演孔圖及崔瓊曹植輩並云古帝韋誕傳玄皇甫謐及鸞

子注荀子注周禮疏拾遺記並云黃帝史臣今從之○佛藏法苑珠林云昔造書之主凡有三人長名曰梵其書右

行次曰佉盧其書左行少者倉頡其書下行梵佉盧居于天竺黃帝史倉頡在于中夏梵佉法取法于淨天倉頡因華于



鳥跡文畫識  
異傳理則同

### 龜書文

河圖玉版云倉頡為帝南巡登陽虛之山臨于玄扈洛汭之水靈龜負書丹甲青文以授之文棍二

十八字景刻于陽虛之石室李斯只識八字○鼎案楊慎云為帝南巡作一句為音去聲言奉黃帝命而代之南巡也亦言黃帝史臣羅泌子革路史注引河圖玉版靈龜負書以授帝謂倉頡也又注云昔周初有於倉頡墓下得石刻藏之書府至秦李斯辨其八字云上天垂命皇辟迭王或云叔孫通識十二字而不傳妄也任昉云周人不能辨而斯通識之予不信者詳攷二句乃寇謙所纂黑帝安和國主禁文也據此則既非龜書之文亦非墓下石刻矣  
○墓下一作墓中

## 上天垂命皇辟迭王

### 三皇策典

出三墳宋羅泌路史著辨云山氣形謂之三墳山墳言君臣民物陰陽兵象謂之連山氣墳言

生動長育止殺謂之歸藏而形墳則言天地日月山川雲氣謂之坤乾復有河圖姓紀與天皇策辭地皇政典之類大率似假義炎黃帝為言以遷就於孔說淺鄙備見是豈隆古包氏語哉有如以燧人為提捷之子有巢為燧人之子伏羲為有巢之子軒轅百皇大庭无懷則皆以為伏羲之臣而加之龍官火紀之號尤可斬也王應麟困學紀聞云三墳書無傳密樣唯易存而商高所云周天愆度管子所云造六釜以迎陰陽者不復見許行為神農之言龜錯述神農之教列子稱黃帝之書陰陽五行兵法醫方皆託之農黃而大道隱焉今有山氣形之書謂之連山歸藏坤乾元豐中毛漸得之西京或云張天覺得之比陽非古也○鼎按毛漸序謂元豐七年使西京得之泌陽民家又有後序云三墳亡于幽厲予天復中隱于青城之西因風雨石裂中有石匣得古

丈三篇皆篆字乃上古三皇書也不見姓名且  
此名三易而文辭乃微書之典謨天復為唐昭  
宗時此即其人唐末妄作矣然羅玉皆不語及  
序則序又後人所增耳今聊附存以著其偽

### 天皇伏羲氏皇策

昔在天皇居於君位咨於將咨於相咨於民垂皇策  
辭皇曰惟我生無道承父居方三十二易草木上升  
君位我父燧皇歸世未降河圖生民結繩而無不信  
於未甲八太七成三十二易草木惟我老極時生人  
衆多羣羣蟲聚欲相吞害惟天至仁於草生月天雨

降河龍馬負圖神開我心子其未生我畫八卦自上而下咸安其居後二成二十二易草木皇曰命子襄居我飛龍之位主我圖文代我咨於四方上下無或私襄曰咸若咨衆之辭君無念哉後一易草木皇曰命子英居我潛龍之位主我陰陽甲歷咨於四方上下無或差英曰依其法亦順君無念哉皇曰無為後二十二易草木吳英氏進歷於君曰歷起甲寅皇曰甲日寅辰乃鳩衆於傳教臺告民示始甲寅易二月

天王升傳教臺乃集生民后女媧子無分臣工大小  
列之右上相共工下相皇桓飛龍朱襄氏潛龍吳英  
氏居君左右栗陸氏居北赫胥氏居南昆連氏居西  
葛天氏居東陰康氏居下九州之牧各統其人羣居  
於外皇曰咨予上相共工我惟老極無為子惟扶我  
正道咨告於民俾知甲歷日月歲時自茲始無或不  
記子勿怠共工曰工居君臣之位無有勞君其念哉  
皇曰下相皇桓我惟老極無為子惟扶我正道撫愛

下民同力咨告於民俾知甲歷日月歲時自茲始無  
或不記子其勿怠桓曰居君臣之位無有勞君其念  
哉皇曰粟陸子居我水龍之位主養草木開道泉源  
無或失時子其勿怠陸曰竭力於民君其念哉皇曰  
大庭主我屋室視民之未居者喻之借力同構其居  
無或寒凍庭曰順民之辭皇曰陰康子居水土俾民  
居處無或漂流勤於道達於下康曰順君之辭皇曰  
渾沌子居我降龍之位惟主於民皇曰昆連子主我

刀斧無俾野獸犧虎之類傷殘生命無俾同類大力  
之徒區遂微弱子其伏之連曰專主兵事君無念哉  
皇曰四方之君咸順我辭則世無害惟愛於民則位  
不危皇曰子無懷安惟安於民民安子安民危子危  
子其念哉

人皇神農氏政典

政典曰惟天生民惟君奉天惟食喪祭衣服教化一  
歸於政皇曰我惟生無德咸若古政嗟爾四方之君

有官有業乃子乃父乃兄乃弟無亂於政昔二君始  
王未有書契結繩而治交易而生亦惟歸政昔在  
天皇肇修文教始畫八卦明君臣民物陰陽兵象以  
代結繩之政出言惟辭制器惟象動作惟變卜筮惟  
占天皇氏歸氣我惟代政惟若古道以立政皇曰正  
天時因地利惟厚於民民惟邦本食惟民天農不正  
食不豐民不正業不專惟民有數惟食有節惟農有  
教林林生人無亂政典政典曰君正一道二三凶臣



正一德有常吉時正惟四亂時不植氣正惟和氣亂  
作癘官正惟百民正惟四色正惟五惟質惟良病正  
四百四藥正三百六十五過數乃亂而昏而毒道正  
常過政反僻刑正平過政反私祿正滿過政反侈禮  
正度過政反僭樂正和過政反流治正簡過政反亂  
喪正哀過政反遊干戈正亂過政反危市肆正貨過  
政反邪譏禁正非過政失用皇曰嗟爾有官有業乃  
子乃父乃兄乃弟咸若我辭一歸於正皇曰君相信

任惟正相君備位惟忠相官統治惟公官相代位惟  
勤民官撫愛惟仁官民事上惟業父無不義厥子惟  
孝兄無不友厥弟惟恭夫不遊妻不淫師不急教不  
失刑者形也形爾身道者導也導爾志禮者制也制  
爾情樂者和也和爾聲政者正也正其事

地皇軒轅氏政典

皇曰嗟爾天師備相正五百官士子農夫商人工技  
咸若我言政典曰國無邪教市無淫貨地無荒土官

無濫士邑無游民山不童澤不涸其正道至矣正道  
至則官有常職民有常業父子不背恩夫婦不背情  
兄弟不去義禽獸不失長草木不失生政典曰方圓  
角直曲邪凹凸必有形遠近高下長短疾緩必有制  
寒暑燥濕風雨逆順必有時金木水火土石羽毛必  
有濟布帛桑麻筋角齒革必有用百工器用必有制  
聖人治天下權以聚財財以施智智以備賢賢以輔  
道道以統下下以事上上以施仁仁以保位位以制

義義以備禮禮以制情情以敦信信以一德德以明  
行行以崇教教以歸政政以崇化化以順性性以存  
命命以保生生以終壽皇曰岐伯天師爾司日月星  
辰陰陽歷數爾正爾考無有差貸先時者殺不及時  
者殺爾惟戒哉皇曰后土中正爾識山川草木蟲魚  
鳥獸爾掌爾察無亂田制以作田訟爾惟念哉皇曰  
龍東正爾分爵祿賢智爾咨爾行無掩大賢以恡財  
無庇惡德以私賞皇曰融南正爾平禮服祭祀爾正

惟無亂國制以僭上無廢祀事以簡恭爾惟念哉皇  
曰太封西正爾分干戈刑法爾掌爾平皇曰太常北  
正爾居田制民事爾訓爾均百工惟良山川爾圖爾  
惟勤恭哉皇曰天師備相五正百官士子農夫商人  
工技咸順我言終身於休

### 高陽氏

帝顓頊

姬姓黃帝曾孫名顓頊兆跡高陽以高陽為氏都帝丘在位七十六載

專令

路史顓頊紹少昊金天之政乘辰而王乃專令曰○史記在五帝紀次黃帝

母慢制母瀆民貴臣驕而弗諛男女不相辟于道者拂  
之四達之衢

### 女皇氏

#### 媯媯

宓犧女弟風姓一曰以雲紀姓代宓犧立號女  
皇氏一曰女希氏都于中皇山之原在位百三

十載司馬貞以伏羲女媯神農為三皇  
易傳及獨斷諸家並無載故置於此

#### 占詞

太昊氏衰其工作亂振滔洪水女媯滅共工  
而遷之然後四極正冀州寧於是乘雷車  
六蜚以御天中祠祝而枚占之占者曰吉徵也  
乃設雲幄而致神明道標萬物神化七十見淮

南子

路史

昭昭九州日月代極平均土地合和萬國

陶唐氏

帝堯

姓伊耆曰放勳帝嘗子初封陶侯徙封于唐嘗  
長子摯立不善諸侯尊堯為天子都平陽在位

百載禪

于虞

堯戒

淮南子人間  
訓堯戒曰

戰戰慄慄日慎一日人莫蹟於山而蹟於蛭

蹟蹟也蛭  
蟻也叶徒

反吉

雒壁書

尚書中候曰帝堯率羣  
臣東沈于雒刻壁書

欽定四庫全書

皇朝文獻

十四

天子臣放勛德薄施行不元

元善也

堯母龍圖文

竹書紀年云堯母慶都觀于三河常有龍隨之一旦龍負圖而至其文要

云既而陰風四合赤龍感之乎十四月而生堯於丹陵其狀如圖○宋書符瑞志引載

永受天祐眉八彩鬚髮長七尺二寸面銳上豐下足履

翼宿

帝堯碑赤龍負圖出慶都讀之云永受天運其下國人衣赤衣鬚鬚尺餘長七尺二寸堯上豐下足

履翼星翹曰赤

帝起成天下寶

有虞氏

帝舜

姓姚曰重華虞幕之後都蒲坂在位四十八載禪于夏



祠田辭

文心雕龍○因學紀聞引尸子曰舜兼愛百姓務利天下其田也荷彼耒耜耕彼南

畝與四海俱有其利文心雕龍謂之祠田豈他有所据乎

荷此長耜耕彼南畝四海俱有

龍圖文

論語比考帝堯率舜等游于首山觀河渚有五老游河渚一曰河圖將來告帝期二曰河圖將來告帝謀三曰河圖將來告帝書四曰河圖將來告帝圖五曰河圖將來告帝符有頃赤龍銜玉苞舒圖刻版題命可卷金泥玉檢封盛書戒曰知我者重瞳也五老乃為流星上入昴黃姚祝之龍沒圖在堯等共發曰

帝當樞百則禪于虞

河圖告舜文

竹書紀年堯將以天下禪舜乃修壇場於河洛率舜等升首山遵河渚有

五老游焉蓋五星之精也相謂曰河圖將來告帝以期知我者重瞳黃姚五老因飛為流星上入昴二月辛丑昧明禮備至於日昃沈璧於河榮光出河休氣四塞白雲起回風搖乃有龍馬銜甲赤文綠色緣壇而上吐甲圖而去其圖以白玉為檢赤土為泥似黃金約以青繩檢文言虞夏當受天命帝寫其言藏于東序○宋書符瑞志引載言虞夏殷周秦漢當受天命

闡色授帝舜

皇霸文紀卷一

欽定四庫全書

皇霸文紀卷二

明 梅鼎祚 編

夏

禹王

奴姓名曰文命崇伯鯀子堯時封于夏受虞禪都安邑在位八歲○孔安國云堯舜禹湯皆名

史記帝王世

紀名文命

箕簾銘

鬻子云禹之治天下也以五聲聽門懸鐘鼓鐸磬而置鞀以得四海之士為銘於箕

箕馬○文心雕龍云

大禹勒筍簾而招諫

教寡人以道者擊鼓教寡人以義者擊鍾教寡人以事

者振鐸語寡人以憂者擊磬語寡人以獄訟者揮鞞

夏箴

汲冢周書文傳解云文王受命九年時維暮春在鄩召太子發曰吾語汝所保所守厚德

廣惠忠信愛人土多民少則內亡守土少人多則民失業是故土多發政以漕四方四方流之土少安帑而外其務方輸夏箴曰云云開望曰土廣無守可襲伐土狹無食可圍竭二禍之來不稱之災天有四殃水旱饑荒其至無時非務積聚何以備之夏箴曰○孔晁注開望古書名楊周修古文韻語作開望箴非

中不容利民乃外次

又箴

小人無兼年之食遇天饑妻子非其有也大夫無兼年之食遇天饑臣妾輿馬非其有也國君無兼年之食遇天饑百姓非其有也戒之哉弗思弗行至無日矣

峒嶼禹碑

徐靈期衡山記云夏禹導水通瀆刻石書名山之高王象之輿地記云禹碑在

峒嶼峰又傳在衡山縣雲密峯宋嘉定中蜀士因樵人引至其所以紙搨其碑七十二字刻于

夢門觀

後亡

承帝曰嗟猷輔佐卿水處與登鳥獸之門參身洪流而明發爾興久旅忘家宿嶽麓庭智營形折心罔弗辰往

求平定華岳太衡宗疏事哀勞餘伸裡鬱塞昏徙南瀆

衍亨衣制食備萬國其寧竄舞永奔

水處讀作洲渚。楊用修云鄴道元

水經注禹治洪水血馬祭衡山於是得金簡玉字之書  
按省玉字通水理也或曰此即金簡玉字之文云劉禹  
錫寄呂衡州化光詩云傳聞祝融峯上有神禹銘古石  
琅玕姿秘文龍虎形崔融云於鑠大禹顯允天德龍畫  
傍分螺書區刻韓退之詩岫嶠山尖神禹碑字青石赤  
形模奇又云千搜萬索何處有森森綠樹猿猴悲蓋亦  
求之而未得見也韓文考異遂謂退之詩為傳聞之誤  
夔州觀刻後亦磨滅近張季文僉憲在長沙得之云是  
宋嘉定中何致字子一者模刻嶽麓  
書院斯文顯晦信有神物護持哉

廬山紫霄峯禹刻

輿地志江西廬山紫霄下有石  
室中有禹刻篆文有好事者絕

而入摹之凡七十餘字止有鴻荒漾余乃樁可  
辨○鼎按史記禹治水山行乘樁此或好事者

傳會也

鴻荒漾余乃樁

慎又觀水經注廬山之南有上霄石高  
壁緬然與霄漢連接上霄之南大禹刻

石志其里數丈尺今猶得刻石之號馬九江中派石在  
落星石傍介立大湖中周迴一里竦立百丈上生林木  
而飛禽不集者舊相傳昔禹治水至此刻石紀功會稽  
覆釜山亦有禹書任昉述異記曰空同山有堯碑禹碣  
皆科斗書淳化帖首有禹篆十二字莆田陳崑山有自  
然仙篆以紙摹之形類禹刻何者詩烏書蟲文不可識  
如讀响嘯神禹碑禹遺跡靈  
秘如此號曰神禹有絲也

玉牒文

湘中記曰衡山有玉牒禹業其文以治水  
送望衡山如陣雲盛弘之荊州記禹登南

欽定四庫全書

皇清文紀

三

徽而祭之獲金簡玉字之  
書○後漢郎國志注引載

祝融司方發其英沐日浴月百寶生

后啓

禹之子在  
位十歲

鑄鼎絲

墨子耕柱篇夏后開使蚩廉析金於山川  
而陶鑄之於昆吾是使翁難卜於白若之

冕曰鼎成三足而方不炊而自烹不舉而自臧  
不遷而自行以祭於昆吾之墟上鄉人言兆之  
絲曰饗矣云云夏后氏失之殷人受之殷人失  
之周人受之夏后殷周之相受也數百歲矣使  
聖人聚其良臣與其桀相而諫豈能知數百歲  
之後哉而鬼神知之是故曰鬼神之明智於聖  
人也猶聰耳明目之與聾瞽也○素今傳墨子  
所載羅泌路史王應麟玉海小異○路史引墨



子云夏后開命飛廉析金于山而陶鑄之于昆  
吾作九鼎鼎成而方不炊自烹不舉自藏不動  
自饗不遷自行國象萬物于鼎側以祭昆吾之  
墟使翁雉雉乙灼于白若之龜繇曰云云一云  
禹也歸藏云啓筮徙九鼎果徙之則此筮徙也  
○玉海引墨子卜於白若之龜曰鼎成四尺而  
方不炊而自烹不舉而自藏不遷而自行祭於  
昆吾之墟乙又言兆之繇曰云云因學紀聞云  
大卜三兆其頌皆千有二百夏后鑄鼎繇以下  
懿氏占成季卜驪姬衛侯及漢丈兆皆龜繇也

逢逢白雲一南一北一西一東九鼎既成遷于三國

帝癸

一名桀后發  
子般湯所殺

伐唐兆辭

歸藏桀筮伐有唐  
枚於熒惑曰不吉

不利出征惟利安處彼為狸我為鼠勿用作事恐傷其父

羿妻筮辭

歸藏羿請不死之藥于西王母羿妻竊之以奔月筮于有黃有黃占之曰吉

翩翩歸妹獨將西行逢天晦芒母驚母恐後且大昌

且靈

憲作其

連山繇

山海經義和帝俊之妻生十日注引啓筮

空桑之蒼蒼八極之既張乃有夫羲和是主日月職出

入以為晦明

商

商王成湯

子姓名履帝嚳于契之後嗣為商侯十七年而滅夏踐天子位十三年都亳

湯盤銘

九字

苟日新日日新又日新

商鼎銘

三十四字○國語郭偃曰商之衰也其銘有之謂鼎銘之成也

嗛嗛之德不足就也不可以矜而祇取憂也嗛嗛之食不足狃也不能為膏而祇離咎也

憂叶於救反

商父乙鼎銘

二十七字

庚午王命寢廟辰見北田四品十二月作冊友史錫賴

貝用作父乙尊冊

宣和博古圖云按友史者太史也曰友者如成王稱太史友之類所

以尊之也古者太史順時規土蓋農官耳說文曰房星為辰田候也今曰辰見則農當舉趾故命以北田四品所以授民時也昔者貨貝而寶龜曰錫賴貝者說文以賴為贏言錫貝之多也此商人作之以享父乙于寢廟而言乃及此者蓋寢廟宗廟也書曰用命賞于祖在宗廟之中作冊以錫有功是亦賞于祖之意乙之號其在商也有天乙有祖乙有小乙有武乙而惟太丁之子止曰乙且此言父乙蓋不知其為何乙也○徐獻忠云此宗廟之器其訓錫臣工者下多用冊冊二字並列此商制也

商兄癸彝銘

二十六字○呂大臨考古圖

丁子王錫爵丙申貝在寒丘用作兄癸彝十九月惟王

九祀世昌正

闕注云右得于鄴按河豈甲居相即鄴郡其文又稱九祀為商器無疑云兄癸者商

以兄弟相及之辭也故祀其先王或稱祖如祖丁貞之類或稱父若父辛旅彝之類或稱兄若此彝之類商人質無諡皆以甲乙記徐獻忠云丁子剛柔不相配合與乙子相類○鼎案穆天子傳五在寒下注云未詳

商兄癸貞銘

二十五字○宣和博古圖二圖所載二器形模雖同疎緻少異

丁子王錫爵丙申貝在寒丘用作兄癸彝十九月惟王九祀

世昌卬

象形卬字○卬以卬形者古人於酒器多以此為飾故尊也爵也皆作此狀蓋欲如卬之炊氣

上下交  
通而已

商父丁彝銘

四十一字  
考古圖

乙酉商貝王曰不

原闕

疋玄曾不戎備

亢

疋乙四日惟

王六祀四日惟內役敢商盟疋

疑丘  
字

用作父丁尊彝示

子

徐獻忠云此文多疑字  
商器銘文簡省無成章

商母乙貞銘

十一字  
博古圖

丙寅王錫貝朋用作母乙彝

是貞乃王錫臣工  
以追享其母氏也

商箴

呂氏春秋名類篇引商箴云  
云以言禍福人或召之也

天降災布祥並有其職

楊用修古文韻語載商箴云天  
曰順順維止地曰固固維寧人

曰信信維聽業此乃呂氏春秋序  
意屬中語未詳何出以為商箴

桑林禱辭

荀子大畧屬湯之時大旱七年翦髮斷  
爪以身為犧牲禱于桑林之野以六事

自責曰何不雨至斯  
極也言未已大雨

政不節與使民疾與宮室崇與婦謁盛與苞苴行與讒

夫興與

節叶即盛叶成○說苑湯使人持三足鼎祝山  
川教之祝曰政不節耶使人疾耶苞苴行耶讒

夫昌耶宮室營耶女謁  
盛耶何不雨之極也

同前

墨子兼愛篇湯貴天子然且不憚  
以身為犧牲以詞說于上帝鬼神

惟予小子履敢用玄牡告于皇天后帝曰今天大旱即

金史四十五卷之三  
卷二  
當朕身履未知得罪于上下有善不敢蔽有罪不敢赦  
簡在帝心萬方有罪即當朕身朕身有罪無及萬方

同前

呂氏春秋湯五年旱翦髮  
劇手自以為牲禱辭曰

余一人有罪無及萬夫萬夫有罪在余一人無以一人  
之不敏使上帝鬼神傷民之命

湯嫁妹之辭

京房  
易傳

無以天子之尊而乘諸侯無以天子之富而驕諸侯陰  
之從陽女之順夫本天地之義也往事爾夫必以禮義



祝網辭

呂氏春秋湯見祝網者置四面其祝曰從天墜者從地出者從四方來者皆離吾網

湯曰嘻盡之矣非桀其孰為此湯乃解其三面置其一面更教之祝漢南之國聞之曰湯之德

及禽獸矣四

十國歸之

昔蛛蝥作網罟今之人學紆欲左者左欲右者右欲高者高欲下者下吾取其犯命者

呂覽注紆緩也學緩殊非文義賈子劉向新序

並作循緒一作修序取作請受

黑玉赤勒文

尚書中候曰天乙在亳諸隣國極負歸德東觀乎洛降三分沈璧退立榮

光不起黃魚雙躍出濟于壇黑烏以雄隨魚亦止化為黑玉赤勒

玄精天乙受神福伐桀克三年天下悉合

歸藏繇辭

太平御覽

有人將來遺我貨貝以至有求則得有喜將至

良人得其玉君子得其粟

有鳧鴛鴦有鴈鷓鴣

鼎有黃耳利取鮎鯉

歸藏齊母經辭

瞿有瞿有甌宵梁為酒尊於兩壺兩踰飲之三日然後

蘇士有澤我取其魚

爾雅注

君子戒車小人戒徒

有白雲出自蒼梧入于大梁

上有高臺下有雖池若以賈市其富如河海

蜚廉石槨銘

史記云蜚廉生惡來父子俱以材力事殷紂周武王之伐紂并殺惡來是

時蜚廉為紂石槨奉使北方還無所報為壇霍泰山而報得石棺銘云死遂葬於霍泰山

帝令處父不與殷亂賜以石棺以華氏

言處父不忘臣節故天賜石棺

以光華其族繁秦為蜚廉之後故為傅會索隱云事蓋非實然周深所不信○處父蜚廉別號

周

文王

姬姓名昌帝嚳子后稷之裔商紂時為西伯

赤爵銜書文

竹書紀年云季秋之甲子赤爵銜書及豐置于昌戶昌拜稽首受其文要

曰

姬昌蒼帝子亡殷者紂

赤爵丹書

周季歷生昌有聖瑞尚書帝命驗云季秋之月甲子赤爵銜丹書入于鄴止于

昌戶其書云蓋聖瑞也○案此即大戴禮所載丹書語以仁得之而下尚父之言也敬勝四句

亦見

荀子

敬勝怠者吉，怠勝敬者滅。義勝欲者從，欲勝義者凶。凡事不強則不枉，不敬則不正。枉者廢，滅敬者萬世以仁得之，以仁守之，其量百世；以不仁得之，以不仁守之，其量十世；以不仁得之，不仁守之，不及其世。

鳳凰銜書文

竹書紀年云：文王時孟春六旬五緯象房，後有鳳凰銜書游文王之都書。

曰

殷帝無道，虐亂天下，皇命已移，不得復久。靈祇遠推，百神吹去，五星聚房，昭理四海。

赤烏銜珪書

墨子赤烏銜珪降周之岐社曰

命周文王伐殷

卜田兆

非龍非虺非熊非羆兆得公侯天遺女師

史記齊世家云西伯將獵

卜之曰所獲非龍非虺非虎非羆所獲霸王之輔○竹書紀年云王將畋史編卜之曰將大獲非熊非羆天遺大師以佐昌臣太祖史疇為禹卜田得皋陶其兆類此○虺一作螭

武王

名發文王子嗣為西伯十三年而滅商踐天子位又六年

尹佚策祝文

史記武王既定商立於社南毛叔鄭奉明水衛康叔封布茲師尚父牽牲

尹佚策祝於是武王再拜稽首

曰膺更大命革商受天明命

殷之末孫季紂殄廢先王明德侮蔑神祇不祀昏暴商

邑百姓其章顯聞于天皇上帝

汲冢周書筮曰殷末孫受德迷先成湯之明侮

滅神祇不祀明暴商邑百姓其彰

顯聞于昊天上帝○紂字受德

丹書

大戴禮云武王踐阼三日召士大夫而問焉曰惡有藏之約行之萬世可以為子孫常者

乎皆曰未得聞也召師尚父而問焉曰黃帝顓頊之道存乎意亦忽不可得見與尚父曰在丹書王欲聞之則齋矣三日王端冕尚父亦端冕奉書道書之言曰云云藏之約行之萬世可以為子孫常者此言之謂也且臣聞之以仁得之以仁守之其量百世以不仁得之以仁守之其量

十世以不仁得之以不仁守之必及其世王聞書之言惕若恐懼退而為戒書託於物以自警

即席几諸

銘是也

敬勝怠者吉怠勝敬者滅義勝欲者從欲勝義者凶凡

事不强則枉弗敬則不正枉者滅廢敬者萬世

滅叶莫筆切。

丹書三

十九字

### 戒書銘十七章

蔡邕銘論武王作席几楹杖器械之銘十有八章。王應麟集解

序篇引盧辯朱熹真德秀注今為節錄。朱子云諸銘有切題者如鑑銘是也亦有不可曉者

古人隨在白

警不必一物



席四端銘

四章

安樂必敬

前左端銘

無行可悔

前右端銘

一反一側亦不可志

後左端銘

所監不遠視爾所代

後右端銘○不志一作以志所一作殷爾一作通

机銘

皇皇惟敬口口生敬口生垢口戕口

盧辯注几者人君出令所依故以言

語為戒○今本無口生敬句

鑑銘

見爾前慮爾後

盟盤銘

與其溺於人也寧溺於淵溺於淵猶可游也溺於人不

可救也

淵叶一均切救叶居尤反○虛注或以自新取戒或以游溺為鑑

楹銘

毋曰胡殘其旤將然毋曰胡害其旤將大毋曰胡傷其

旤將長

害叶暇總切大叶特計切○真德秀注銘之於楹朝夕見之虛指楹為言恐鑿

杖銘

惡乎危於忿懣惡乎失道於嗜慾惡乎相忘於富貴

真注

杖之為物于以自扶操之則安全有賴舍之則顛  
踣可虞富貴奢淫易忘兢畏於杖為銘是或此義

### 帶銘

火滅修容慎戒必恭恭則壽

王應麟注非禮勿動聞不  
欺也莊敬日強壽之基也

### 履屨銘

慎之勞勞則富

盧注行慎躬勞躬勞終福論慎履亦  
財不匱也履在下猶勞辱因此為戒

### 觴豆銘

食自杖食自杖戒之僇僇則逃

僇居妖反○盧注無  
求醉飽自杖而已

### 戶銘

夫名難得而易失無懃弗志而曰我知之乎無懃弗及  
而曰我杖之乎獲阻以泥之若風將至必先搖搖雖有  
聖人不能為謀也

杖一作枝搖叶夷周切。獲舊作擾朱注未詳楊用修云獲獲人塗屋之

匠解見漢書音乃刃切

### 牖銘

隨天之時以地之財敬祀皇天敬以先時

財叶前西切朱注牖下

齋祭之處真注天實生時地實生財祀以報本亦必先時

### 劔銘

帶之以為服動必行德行德則興倍德則崩

盧注以順誅也

### 弓銘

屈申之義廢興之行無忘自過

王注屈申之義以弓言廢興之行以身言修身

在知其過

### 矛銘

造矛造矛少間弗忍終身之羞

余一人所聞以戒後世子孫按余一人二句總

承諸銘為踐阼一篇結末正應前可以為子孫常者乎玉海詩紀作矛銘語誤

### 書銘二十章

太公金匱武王曰吾隨師尚父之言因為書銘隨身自誡○太平御覽因

學紀開玉

海並載

書冠

寵以著首將身不正遺為德咎

書履

行必履正無懷僥倖

書劔

常以服兵而行道德行則福廢則覆

書車

自致者急載人者緩取欲無度自致而反

書鏡

以鏡自照則知吉凶

此與太公陰謀所載  
鏡銘畧同彼義完矣

書門

敬遇賓客貴賤無二

書戶

出畏之入懼之

書牖

闕望審且念所得可思所忘

書鑰

昏謹守深察訛

書硯

石墨相著而黑邪心讒言無得汙白

書鋒

忍之須臾乃全汝軀

書刀



刀利磴磴無為汝開

書井

原泉滑滑連旱則絕取事有常賦歛有節

几銘

以下二章見後漢書崔駰傳注引太公金匱曰吾欲造起居之戒隨之以身

安無忘危存無忘亡熟惟二者後必無凶

杖銘

輔人無苟扶人無咎

一作容

衣銘

以下三章見後漢書朱穆傳注引太公陰謀

桑蠶苦女工難得新捐故後必寒

鏡銘

以鏡自照見形容以人自照見吉凶

觴銘

樂極則悲沈湎致非社稷為危

筆銘

以下二章見太平御覽引太公陰謀

毫毛茂茂陷水可脫陷文不活

筆銘

馬不可極民不可劇馬極則躓民極則敗

敗叶蒲昧切  
○困學紀聞

云蔡邕銘論謂武王踐阼咨于太師作席几楹杖器械之銘十有八章參攷金匱陰謀之書則不止于十八章矣書于篇後俾好古者有攷

金版銘

文選劉孝標論註引太公金匱曰云武王曰請著金版○七略云太公金版玉匱

雖近世之文然多善者

屈一人之下申萬人之上

金匱銘

堯之居民上也振振如臨深淵舜之居民上也慄慄恐

朝不及夕武王曰吾并殷民居其上也翼翼懼不敢息

五帝戒

太公金匱武王問師尚父曰五帝之戒可得聞乎師尚父曰

黃帝居民上惴惴若臨深淵舜居民上矜矜如履薄冰禹居民上慄慄如不滿日湯居民上翼翼乎懼不敢息

敬勝怠則吉義勝欲則昌日慎一日壽終無殃

玉海引六韜明

傳篇義勝欲則昌欲勝義則亡敬勝怠則吉怠勝敬則減荀子議兵篇敬勝怠則吉怠勝敬則減計勝欲則從欲勝計則凶蓋出于此按丹書亦此數語大較所傳聞異而辭大同耳

比干墓銅盤銘

武王封比干墓而作也

右林左泉後岡前道萬世之寧於焉是保

蒲堂集  
古錄

膠鬲盟書

呂氏春秋誠廉篇周之將興也伯夷叔齊西行如周至岐陽文王已歿武王即

位使叔且就膠鬲于次四內而與之盟使保召公就微子開于共頭之下而與之盟列為三書同辭血以牲埋一于四內及共頭皆以一歸夷齊聞之笑曰謔割牲而盟以為信因四內共頭以明行以此紹殷是以亂易暴也北行至首陽餓焉○四內地名共頭水名

加富三等就官一列

微子開盟書

世為長侯守殷常祀相奉桑林宜私孟諸

成王

名誦武王子

卜成周命龜辭

說苑南宮邊子曰昔周成王之卜居成周也其命龜曰○一作周公

卜洛命

龜辭

予一人兼有天下辟就百姓敢無中土乎使予有罪則

四方伐之無難得也

呂氏春秋南宮括曰成王定成周其辭曰惟予一人營居于成周惟

予一人有善易得而見也  
也有不善易得而誅也

周公旦

武王弟

卜曲阜命辭

作邑乎山之陽賢則茂昌不賢則速亡

誓命

左傳昔紀公太子僕弑紀公以寶玉來奔內諸宣公季文子使太史克對引周公誓命詳

後

毀則為賊掩賊為藏竊賄為盜盜器為姦主藏之名賴姦之用為大凶德有常無赦在九刑不忘

金人銘

家語曰孔子觀周入后稷之廟有金人焉三緘其口而銘其背顧謂弟子曰小子識

之此言實而中情而信○文心雕龍曰周公慎言于金人則此銘周公所作也○路史黃帝以惟口起兵惟動得否乃為金人三緘其口而銘之注引太公金匱公對武王之言明黃帝所作

皇覽記引陰謀黃帝金人器銘曰武王問尚父  
五帝之戒對曰黃帝之戒曰吾之居民上也搖  
搖恐朝不及夕故為金人三封其口  
曰我古之慎言人也當以家語為正

古之慎言人也戒之哉無多言多言多敗無多事多事  
多患安樂必戒無行所悔勿謂何傷其禍將長勿謂何  
害其禍將大勿謂不聞神將伺人焰焰不滅炎炎若何  
涓涓不壅終為江河綿綿不絕或成網羅毫末不札將  
尋斧柯誠能慎之福之根也曰是何傷禍之門也強梁  
者不得其死好勝者必遇其敵盜憎主人民怨其上



君子知天下之不可上也故下之知衆人之不可先也  
故後之溫恭慎德使人慕之執雌持下人莫踰之人皆  
趨彼我獨守此人皆惑之我獨不徙內藏我知不示人  
拔我雖尊高人莫我害江海雖左長于百川以其卑也  
天道無親常與善人戒之哉

國策蘇秦說魏襄王引周書曰綿綿不絕蔓蔓若何

毫毛不拔將成斧柯前慮不定後有大患將奈之何

同前 說苑

古之慎言人也戒之哉戒之哉無多言多言多敗無多

事多事多患安樂必戒無行所悔勿謂何傷其禍將長  
勿謂何害其禍將大勿謂何殘其禍將然勿謂莫聞天  
妖同人熒熒不滅炎炎柰何涓涓不壅將成江河綿綿  
不絕將成網羅青青不伐將尋斧柯誠不能慎之禍之  
根也曰是何傷禍之門也強梁者不得其死好勝者必  
遇其敵盜怨主人民害其貴君子知天下之不可蓋也  
故後之下之使人慕之執雌持下莫能與之爭者人皆  
趨彼我獨守此衆人惑惑我獨不徙內藏我知不與人

論技我雖尊高人莫害我夫江河長百谷者以其卑下也天道無親常與善人戒之哉戒之哉

辛甲

故殷之臣事紂七十五諫而不聽去至周召公與語賢之告文王以為公卿封長子武王時為

太史見劉向別

錄譙周古史

虞箴

左傳云魏莊子謂晉侯曰昔周辛甲之為太史命百官箴王闕於虞人之箴曰

芒芒禹跡畫為九州經啟九道民有寢廟獸有茂草各有攸處德用不擾在帝夷羿冒于原獸忘其國恤而思其麀牡武不可重用不恢于夏家獸臣司原敢告僕夫

道叶徒口反茂一作豐草叶此苟反擾叶忍九  
反獸叶如九反胃貪也重去聲家叶攻乎反

大正箴

汲冢周書嘗麥解曰維四年孟夏王初祈  
禱于宗廟乃嘗麥于太祖即假于太宗少

宗少秘于社太史筴刑書九篇以升授  
大正箴大正曰○以下二箴無名氏

欽之哉諸正敬功爾頌審三節無思民因順爾臨獄無  
頗正刑有撥夫循乃德式監不遠以有此人保寧爾國  
克戒爾服世世是其不殆維公咸若

周箴

呂氏春秋謹聽篇太上知之其次知其不知  
不知則問不能則學周箴云云學賢問三代

之所以

昌也

夫自念斯學德未暮

祝雍

祝官  
雍名

成王冠祝辭

家語云武王崩成王年十三嗣立周公攝政以治天下冠成王而朝于祖

以見諸侯周公使祝雍作頌命之曰祝辭達而勿多也其頌曰云云

使王近於民遠於佞嗇於特惠於財親賢使能

佞叶禰  
因反財

叶前西反能叶音  
泥○使一作任

近于民遠于年近于義遠于佞嗇于財任賢使能

佞音  
能

音得來切

後漢志注

成王冠頌

令月吉日王始加元服去王幼志服是袞職欽若昊命  
六合是式率爾祖考永永無極

王滿生

告周公旦書

劉向說苑齊人王滿生見周公曰言  
內事者於內言外事者於外周公導

生曰臣聞聖人不言而知非聖人者雖言不知  
今欲言乎無言乎周公俛念有頃不對王滿生  
稽筆牘書之周公仰視見書曰  
唯唯謹聞命矣明日誅管蔡

社稷且危傳之於膺

士冠禮辭

儀禮○以下紀並無名氏蓋周制禮時所作

始加祝辭

士冠始加緇布冠服玄端爵釋

令月吉日始加元服棄爾幼志順爾成德壽考惟祺介

爾景福

服叶蒲北反福叶筆助反

再加

再加皮弁服素積素釋

吉月令辰乃申爾服敬爾威儀淑慎爾德眉壽萬年永

受胡福

三加

三加爵弁服纁裳鞅鞞

以歲之正以月之令咸加爾服兄弟具在以成厥德黃

耆無疆受天之慶

叶墟  
羊反

醴辭

三加畢賓  
醴冠者

甘醴惟厚嘉薦令芳拜受祭之以定爾祥承天之休壽

考不忘

醴辭

若不醴則醴注醴禮簡尚質也醴禮繁尚  
文也醴亦賓醴冠者冠有三加故三醴也

旨酒既清嘉薦宜時始加元服兄弟具來孝友時格永

乃保之

來叶乃  
之切



再醮

旨酒既滑嘉薦伊脯乃申爾服禮儀有序祭此嘉爵承天之祜

三醮

旨酒令芳籩豆有楚咸加爾服肴升折俎承天之慶受福無疆

字辭

既醴冠者見母出賓字之

禮儀既備令月吉日昭告爾字爰字孔嘉髦士攸宜宜

之于假永受保之曰伯某父

備叶筆力反字叶茲  
嘉叶居之反假叶古

士昏禮辭

儀禮

父命子辭

往迎爾相承我宗事助率以敬先如之嗣若則有常

父命女辭

戒之戒之夙夜無違命

母命女辭

勉之敬之夙夜無違宮事

庶母命女辭

敬恭聽宗爾父母之言夙夜無愆視諸衿鞶

祭禮嘏辭

儀禮少牢饋食曰主人酌尸尸酢主人  
佐食取黍授尸執以命祝祝受以東北

面嘏主人曰○此諸  
侯之大夫祭禮也

皇尸命工祝承致多福無疆于女孝孫來女孝孫使女

受祿于天宜稼于田眉壽萬年勿替引之

來讀曰釐賜  
也孫叶須因

反天叶鐵因反田叶地因反年叶禰

因反○楊用修古文附錄來音賚

周祭天辭

以下三章俱見大戴禮○文心雕龍云  
周之太祝掌六祝之辭是以庶物咸生

陳於天地之郊旁作

穆穆唱於迎日之拜

皇皇上天照臨下土集地之靈降甘風雨庶物羣生各

古祝辭則云嗣

得其所靡今靡古維予一人某敬拜皇天之祐

王某或曰一人某王者親告之辭也

### 祭地辭

薄薄之土承天之神興甘風雨庶卉百穀莫不茂者既

安且寧維予一人某敬拜下土之靈

者叶掌與切

### 迎日辭

古者帝王以正月朔率有司迎日于東郊所以為萬品先而尊事天也○亦見尚書

大傳三句

與洛誥同

維某年某月上日明光于上下勤施于四方旁作穆穆

維予一人某敬拜迎于郊

救日食祝辭

周官太祝注

炤炤大明纖滅無光柰何以陰侵陽以卑侵尊

雩祭禱辭

穀梁傳注

方今大旱野無生稼寡人當死百姓何詢不敢煩民請  
命願撫百姓以身塞無狀

請雨祝

春秋緯

昊天生五穀以養人今五穀病旱恐不成敬進清酒搏脯再拜請雨雨幸大澍

立社祝

禮外篇大夫成羣立社祝曰○此亦止雨之辭

今某月日君為某立社社祭土而主陰氣也五穀用成萬民以生敢用肥豚嘉蔬清酒敬致大神自今日以來祈請雨止惟靈是聽子孫眉壽萬神含靈

止雨祝

禮外篇

天生五穀以養生民今天雨不止傷五穀如何神靈而行而止殺牲以賽神靈雨則不止鳴鼓攻之朱緣繩索而脅之

並太平御覽引載

命射辭

大戴禮投壺篇用學紀聞云此命射之辭也

弓既平張四侯且良決拾有常既順乃讓乃降其堂乃節其行既志乃張射夫命射射者之聲御車之旌既獲

弃奠

此下缺

祭侯辭

考工記曰梓人為侯張皮侯而棲鵠則春以功張五采之侯則遠國屬張獸侯則王

以息燕祭侯之禮  
以酒脯醢其辭曰

惟若寧侯毋或若女不寧侯不屬於王所故抗而射女

強飲強食貽女曾孫諸侯百福

若汝也寧安也侯之為物捍內蔽外有諸侯之

象焉故假以為戒較諸侯之辭言汝當安為諸侯下若字訓如盍責之曰毋如此等不寧之侯不服屬於天子之所故立而射之也強飲強食祝神之辭勉之使飲食也既飲食醉飽當以百福遺女曾孫之為諸侯也

嗟爾不寧侯為爾不朝于王所故亢而射女強食爾食

曾孫侯氏百福

大戴禮曰班固白虎通侯者以布為之所以名為侯明諸侯有不朝者則射之

故禮射禮祝曰嗟爾不寧侯爾不朝于王所以故天下夫業亢而射爾所以不射正身君子重同類故畫獸而



射之○大戴禮弟子辭曰無荒無傲無倨立無踰言若是者有常爵嗟爾不寧侯云云按此豈皆弟子之辭特用考工記語邪

### 大卜祝龜文

褚先生補史記龜策傳或古太卜之遺

今日吉謹以梁卯煇黃袂去玉靈之不祥玉靈必信以誠知萬事之情辯兆皆可占不信不誠則燒玉靈揚其

灰以徵後龜

言用梁米雞卵以袂龜煇黃二說索隱煇音次第之第燒荆枝遽灼而以黃絹裹梁

卵也正義煇音題焦也若焦黃則卜之不中也故用梁卵以袂之○尊神龜為玉靈

又

假之玉靈夫子夫子玉靈荆灼而心令而先知而上行  
於天下行於淵諸靈數剝莫如汝信今日良日行一良

貞

行一作身

又

假之靈龜五筮五靈不如神龜之靈知人死知人生某  
身良貞

大橫占辭

史記漢文帝初為代王諸大臣迎立也  
猶與未定卜之卦兆得大橫占曰云云

代王曰寡人固已為王矣卜人曰所謂  
謂天王者乃天子於是入即帝位

大橫庚庚余為天王夏啓以光

大橫以荆灼龜文正直也庚更也言去諸侯即

也帝位

嘉林龜左胥書文

史記龜策傳萬畢石朱方傳曰有神龜在江南嘉林中嘉林者


獸無虎狼鳥無鷓泉草無毒螫野火不及斧斤不至是為嘉林龜在其中常巢於芳蓮之上左

胥書文

甲子重光得我者匹夫為人君有土正諸侯得我為帝

王

正長也為有土之官長



皇朝文紀卷二

欽定四庫全書

集部

皇朝文紀卷三

四

詳校官庶吉士臣謝恭勳

主事銜臣徐以坤覆勘

總校官知縣臣繆琪

校對官中書臣朱忻

謄錄監生臣曹錫爵

欽定四庫全書

皇霸文紀卷三

明 梅鼎祚 編

周二

穆王

名滿昭王子成王曾孫在位五十五年

穆天子傳

晉太康二年汲縣民不准發古冢所得古文竹簡素絲編多毀殘缺穆天子傳五篇荀勗序錄定為六卷藏之中經副在三閣郭璞為注左傳曰穆王欲肆其心周行天下

皆使有車轍馬跡焉則其事也

前缺

飲天子蠲山之上戊寅天子北征乃絕漳水庚辰

至於闕觴天子於盤石之上天子乃奏廣樂載立不舍

至于鉞山之下癸未雨雪天子獵于鉞山之西阿於是

得絕鉞山之隊北循葦沱之陽乙酉天子北升于闕天

子北征于犬戎犬戎闕胡觴天子于當水之陽天子乃

樂闕賜七萃之士戰庚寅北風雨雪天子以寒之故命

王屬休甲午天子西征乃絕隃之闕陞己亥至于焉居

禺知之平辛丑天子西征至于郿人河宗之子孫郿栢

絮且逆天子于智之闕先豹皮十良馬二六天子使井

利受之癸酉天子舍于漆澤乃西釣于河以觀關智之

關甲辰天子獵于滲澤於是得白狐玄貉焉以祭于河

宗丙午天子飲于河水之阿天子屬六師之人于鄘邦  
之南滲澤之上戊寅天子西征驚行至于陽紆之山河  
伯無夷之所都居是惟河宗氏河宗伯天逆天子燕然  
之山勞用束帛加璧先白關天子使鄒父受之癸丑天  
子大朝于燕關之山河水之阿乃命非利梁固聿將六  
師天子命吉日戊午天子大服冕褱帔帶搢笱夾佩奉



壁南面立于寒下曾祝佐之官人陳牲全五闕具天子  
授河宗璧河宗伯天受璧西向沈璧于河再拜稽首祝  
沈牛馬豕羊河宗闕命于皇天子河伯號之帝曰穆滿  
女當永致用昔事南向再拜河宗又號之帝曰穆滿示  
女春山之瑤詔女昆侖闕舍四年泉七十乃至于崑崙  
之丘以觀春山之瑤賜語晦天子受命南向再拜己未  
天子大朝于黃之山乃披圖視典用觀天子之瑤器曰  
天子之瑤玉果璿珠燭銀黃金之膏天子之瑤萬金闕

珣百金士之珣五十金鹿人之珣十金天子之弓射人

步劔牛馬犀

關

器千金天子之馬走千里勝人猛獸天

子之狗走百里執虎豹柏天曰征鳥使翼曰關鳥鳶鶴

雞飛八百里名獸使足

關

走千里狡狴關野馬走五百

里叩叩距虛走百里麋

關

二十里曰伯天皆致河典乃

乘渠黃之乘為天子先以社西土乙丑天子西濟于河

關

爰有溫谷樂都河宗氏之所遊居丙寅天子屬官效

器乃命正公郊父受敕憲用伸

關

八駿之乘以飲于枝

詩之中積石之南河天子之駿赤驥盜驪白義踰輪山

子渠黃華騶綠耳狗重工徹止萑狝闕黃南闕來白天

子之御造父三百耿脩芍及曰天子是與出闕入數田

獵釣弋天子曰於乎予一人不盈于德而辨于樂後世

亦追歎吾過乎七萃之士闕天子曰後世所望無失天

常農工既得男女衣食百姓瑤富官人執事故天有眷

民闕民響闕何謀於樂何意之忘與民共利世以為常

也天子嘉之賜以左佩華也乃再拜頓首闕栢天曰闕

封膜畫于河水之陽以為殷人主丁巳天子西南升

闕

之所主居爰有大木碩草爰有野獸可以田獵戊午

闕之人居慮獻酒百闕于天子天子已飲而行遂宿于

崑崙之阿赤水之陽爰有鸚鳥之山天子三日舍于鸚

鳥之山闕吉日辛酉天子升于昆侖之邱以觀黃帝之

宮而豐闕隆之葬以詔後世癸亥天子具蠲齊牲全以

禋闕昆侖之邱甲子天子北征舍于珠澤以釣于流水

曰珠澤之數方三十里爰有萑葦莞蒲茅苴蒹萋乃獻

白玉闕隻闕角之一闕三可以闕沐乃進食闕酒十闕

姑剝九闕闕亦味中麋胄而滑因獸食馬三百牛羊三千

天子闕昆侖以守黃帝之宮南司赤水而北守春山之

寶天子乃闕之人闕吾黃金之環三五朱帶貝飾三十

工布之四闕吾乃膜拜而受天子又與之黃牛二六以

三十闕人於昆侖邱季夏丁卯天子北升于春山之上

以望四野曰春山是唯天下之高山也孳木闕華畏雪

天子於是取孳木華之實曰春山之澤清水出泉溫和

無風飛鳥百獸之所飲食先王所謂縣圃天子於是得  
玉策枝斯之英曰春山百獸之所聚也飛鳥之所棲也  
爰有闕獸食虎豹如糜而載骨盤闕始知膚小頭大鼻  
爰有赤豹白虎熊羆豺狼野馬野牛山羊野豕爰有白  
鳥青鵬執犬羊食豕鹿曰天子五日觀于春山之上乃  
為銘迹于縣圃之上以詔後世壬申天子西征甲戌至  
于赤烏赤烏之人闕其獻酒千斛于天子食馬九百羊  
牛三千糶麥百載天子使祭父受之曰赤烏氏先出自

周宗大王亶父之始作西土封其元子吳太伯于東吳  
詔以金刃之刑賄用周室之璧封丌璧臣長季綽于春  
山之夙妻以元女詔以玉石之刑以為周室主天子乃  
賜赤烏之人闕其墨乘四黃金四十鎰貝帶五十珠三  
百裹丌乃膜拜而受曰闕山是唯天下之良山也寶玉  
之所在嘉穀生之草木碩美天子於是取嘉禾以歸樹  
于中國曰天子五日休于闕山之下乃奏廣樂赤烏之  
人丌獻好女于天子女聽女列為嬖人曰赤烏氏美人

之地也寶玉之所在也已卯天子北征趙行闕舍庚  
辰濟于泮水辛巳入于曹奴之人戲觴天子于泮水  
之上乃獻食馬九百牛羊七千糝米百車天子使逢  
固受之天子乃賜曹奴之人戲闕黃金之鹿銀闕貝  
帶四十珠四百褭戲乃膜拜而受壬午天子北征東  
還甲申至于黑水西膜之所謂鴻鷺於是降雨七日  
天子留骨六師之屬天子乃封長肱于黑水之西河  
是惟鴻鷺之上以為周室主是曰留骨之邦辛卯天



子北征東還乃循黑水癸巳至于羣玉之山容闕氏

之所守曰羣玉田山闕知阿平無險四轍中繩先王

之所謂策府寡草木而無鳥獸爰有闕木西膜之所

謂闕天子於是取玉三乘玉器服物於是載玉萬隻

天子四日休羣玉之山乃命邢侯待攻王者孟秋丁

酉天子北征闕之人潛時觴天子于羽陵之上乃獻

良馬牛羊天子以其邦之攻玉石也不受其牢栢天

曰闕氏檻闕之後也天子乃賜之黃金之罌三六朱

三百裏潛時乃膜拜而受戊戌天子西征辛丑至于  
剗閭氏天子乃命剗閭氏借食六師之人于鐵山之  
下壬寅天子登于鐵山乃徹祭器于剗閭之人温歸  
乃膜拜而受天子已祭而行乃遂西征丙午至于鷓  
韓氏爰有樂野温和稌麥之所草犬馬牛羊之所昌  
寶玉之所闕 丁未天子大朝于平衍之中乃命六師  
之屬休已酉天子大饗正公諸侯王吏七萃之士于  
平衍之中鷓韓之人無鳧乃獻良馬百匹用牛三百

良犬七千牝牛二百野馬三百牛羊二千糝麥三百  
車天子乃賜之黃金銀罌四七貝帶五十珠三百裹  
變闕雕官無鳧上下乃膜拜而受庚戌天子西征至  
于玄池天子三日休于玄池之上乃奏廣樂三日而  
終是曰樂池天子乃樹之竹是曰竹林癸丑天子乃  
遂西征丙辰至于苦山西膜之所謂茂苑天子於是  
休獵於是食苦丁巳天子西征己未宿于黃鼠之山  
西闕乃遂西征癸亥至于西王母之邦吉日甲子天

子賓于西王母乃執白圭玄璧以見西王母好獻錦  
組百純闕組三百純西王母再拜受之闕乙丑天子  
觴西王母于瑤池之上西王母為天子謠曰白雲在  
天山陔自出道里悠遠山川間之將子無死尚能復  
來天子答之曰子歸東土和治諸夏萬民平均吾顧  
見汝比及三年將復而野天子遂驅升于弇山乃紀  
丌跡于弇山之石而樹之槐眉曰西王母之山西王  
母之山還歸丌闕世民作憂以吟曰比徂西土爰居

其野虎豹為羣於鵲與處嘉命不遷我惟帝天子大  
命而不可稱顧世民之恩流涕崩隕吹笙鼓簧中心  
翔翔世民之子唯天之望丁未天子飲于温山關老  
鳥已酉天子飲于潯水之上乃發憲令詔六師之人  
關其羽爰有關藪水澤爰有陵衍平陸碩鳥物羽六  
師之人畢至于曠原曰天子三月舍于曠原關天子  
大饗正公諸侯王勒七萃之士于羽琤之上乃奏廣  
樂關六師之人翔畋于曠原得獲無疆鳥獸絕羣六

師之人大畋九日乃駐于羽之關收皮效物債車受

載天子於是載羽百車己亥天子東歸六師關起庚

子至于關之山而休以待六師之人庚辰天子東征

癸未至于戊關之山智氏之所處關智關往天子于

戊關之山勞用白驂二疋野馬野牛四十守犬七十

乃獻食馬四百牛羊三千曰智氏關天子北遊于緡

子之澤智氏之夫獻酒百關于天子天子賜之狗璫

采黃金之罌二九貝帶四十珠丹三百裹桂薑百關

乃膜拜而受乙酉天子南征東還己丑至于獻水乃  
遂東征飲而行乃遂東南己亥至于瓜纒之山三周  
若城闕氏胡氏之所保天子乃遂東征南絕沙衍辛  
丑天子渴于沙衍求飲未至七萃之士高奔戎刺其  
左驂之頸取其青血以獻天子天子美之乃賜奔戎  
佩玉一隻奔戎再拜喏首天子乃遂南征甲辰至于  
積山之邊爰有蒙栢曰哥余之人命懷獻酒于天子  
天子賜之黃金之罌貝帶朱丹七十裏命懷乃膜拜

而受乙巳闕諸飡獻酒于天子天子賜之黃金之嬰  
貝帶朱丹七十裏諸飡乃膜拜而受之庚辰至于滔  
水濁繇氏之所食辛巳天子東征癸未至于蘇谷骨  
飡氏之所以被乃遂南征東還丙戌至于長泚重醜  
氏之西疆丁亥天子升于長泚乃遂東征庚寅至于  
重醜氏黑水之阿爰有野麥爰有答董西膜之所謂  
木禾重醜氏之所食爰有采石之山重醜氏之所守  
曰枝斯璿瑰瑕瑤琅玕玲瓏无瓊玕琪徽尾凡好石



之器於是出孟秋癸巳天子命重緹氏共食天子之屬五日丁酉天子升于采石之山於是取采石焉天子使重緹之民鑄以成器于黑水之上器服物佩好無疆曰天子一月休秋癸亥天子觴重緹之人鰥虺乃賜之黃金之罌闕二九銀鳥一隻貝帶五十珠七百裏篙箭桂薑百齒絲繡雕官鰥虺乃膜拜而受乙丑天子東征鰥虺送天子至于長沙之山闕隻天子使伯天受之栢天曰重緹氏之先三苗氏之闕處以黃

水蠶銀采關乃膜拜而受丙寅天子東征南還己巳至

于文山西膜之所謂關觴天子于文山西膜之人乃獻

食馬三百牛羊二千糶米千車天子使畢矩受之曰關

天子三日遊于文山於是取采石壬寅天子飲于文山

之下文山之人歸遺乃獻良馬十駟用牛三百守狗九

十犛牛二百以行流沙天子之豪馬豪牛尨狗豪羊以

三十祭文山又賜之黃金之罌二九貝帶三十米三百

裹桂薑百崗歸遺乃膜拜而受癸酉天子命駕八駿之

乘右服黼騶而左綠耳右驂赤龍而左白馵天子主車  
造父為御閻閻為右次車之乘右服渠黃而左踰輪右  
盜驪而左山子栢天主車參百為御奔戎為右天子乃  
遂東南翔行馳驅千里至于巨蒐之人獠奴乃獻白鵠  
之血以飲天子因具牛羊之漣以洗天子之足及二乘  
之人甲戌巨蒐之獠奴觴天子于焚留之山乃獻馬三  
百牛羊五千秋麥千車膜稷三十車天子使栢天受之  
好獻枝斯之石四十僮鵠鬻艷琕珖佩百隻琅玕四十瓞

堯十篋天子使造父受之闕乃賜之銀木璣采黃金之

罍二九貝帶四十朱三百裹桂薑百崗繡奴乃膜拜而

受乙亥天子南征陽紆之東尾乃遂絕憇晉之谷已至

于緱瑀河之水北阿爰有漿澍之闕河伯之孫事皇天

子之山有模董其葉是食明后天子嘉之賜以佩玉一

隻栢天再拜稽首癸丑天子東征栢天送天子至于鄘

人鄘伯絮觴天子于淶澤之上斲多之汭河水之所南

還曰天子五日休于淶澤之上以待六師之人戊午天

子東征顧命栢天歸于丌邦天子曰河宗正也栢天再拜稽首天子南還升于長松之墜孟冬壬戌至于雷首犬戎胡觴天子于雷首之阿乃獻食馬四六天子使孔牙受之曰雷水之平寒寡人具犬馬牛羊爰有黑牛白角爰有黑羊白血癸亥天子南征升于髡之墜丙寅天子至于鈺山之墜東升于三道之墜乃宿于二邊命毛班逢固先至于周以待天之命癸酉天子命駕八駿之乘赤驥之駟造父為御闕南征翔行逕絕程道升于太

行南濟于河馳驅千里遂入于宗周官人進白鵠之血以飲天子以洗天子之足造父乃具羊之血以飲四馬之乘一庚辰天子大朝于宗周之廟乃里西土之數曰自宗周灑水以西至于河宗之邦陽紆之山三千有四百里自陽紆西至于西夏氏二千又五百里自西夏至于珠余氏及河首千又五百里自河首襄山以西南至于春山珠澤昆侖之邱七百里自春山以西至于赤烏氏春山三百里東北還至于羣玉之山截春山以北自

羣玉之山以西至于西王母之邦三千里闕自西王母之邦北至于曠原之野飛鳥之所解其羽十有九百里闕宗周至于西北大曠原萬四千里乃還東南復至于陽紆七千里還歸于周七千里各行兼數三萬有五千里吉日甲申天子祭于宗周之廟乙酉天子闕六師之人于洛水之上丁亥天子北濟于河闕羝之隊以西北升于盟門九河之隆乃遂西南仲冬壬辰至臯山之上乃奏廣樂三日而終吉日丁酉天子入于南鄭寶處曰

天子四日休于濩澤於是射鳥獵獸丁丑天子闕雨乃  
至祭父自圃鄭來謁留昆歸玉百枚陵翟致賂良馬百  
駟歸畢之寶以詰其成陵子哥胡闕東牡見許男于洧  
上祭父以天子命辭曰去茲羔用玉帛見許男不敢辭  
還取束帛加璧闕毛公舉幣玉是日也天子飲許男于  
洧上天子曰朕非許邦而恤百姓闕也咎氏宴飲毋有  
禮許男不敢辭升坐于出尊乃用宴樂天子賜許男駿  
馬十六許男降再拜空首乃升平坐及暮天子遣許男



歸癸亥天子乘鳥舟龍卒浮于大沼夏庚午天子飲于

洧上乃遣祭父如圃鄭用闕諸侯辛未天子北還釣于

漸澤食魚于桑野丁丑天子里圃田之路東至于房西

至于闕邱南至于桑野北盡經林煮闕之藪南北五十

闕十虞東虞曰兔臺西虞曰櫟邱南虞曰富邱闕北虞

曰相其御虞曰闕來十虞所闕辰天子次于軍邱以畋

于藪闕甲寅天子作居范宮以觀桑者乃飲于桑中天

子命桑虞出闕桑者用禁暴人仲夏甲申天子闕所庚

寅天子西遊乃宿于祭壬寅祭公飲天子酒乃歌闕天  
之詩天子命歌南山有粃乃紹宴樂丁酉天子作臺以  
為西居壬寅天子東至于雀梁甲辰浮于滎水乃奏廣  
樂季夏庚闕休于范宮仲秋丁巳天子射鹿于林中乃  
飲于孟氏爰舞白鶴二八還宿于雀梁季秋辛巳天子  
司戎于闕來虞人次御孟冬鳥至王臣闕弋仲冬丁酉  
天子射獸休于深萑得麋麝豕鹿四百有二十得二虎  
九狼乃祭于先王命庖人熟之戊戌天子西遊射于中

關方落草木鮮命虞人掠林除藪以為百姓材是日也天子北入于剛與井公博三日而決辛丑塞至于臺乃大暑除天子居于臺以聽天下之遠方關之數而衆從之是以選扞乃載之神人關之能數也乃左右望之天子樂之命為關而時關焉關其名曰關公去乘人關猶關有虎在乎葭中天子將至七萃之士高奔戎請生捕虎必全之乃生捕虎而獻之天子命之為柙而畜之東虞是為虎牢天子賜奔戎駉馬十駟歸之太牢奔戎再

拜詣首丙辰天子北遊于林中乃大受命而歸仲秋甲  
戌天子東遊次于崔梁闕蠹書于羽林季秋闕乃宿于  
防畢人告戎曰隄翟來侵天子使孟愈如畢討戎霍侯  
舊告薨天子臨于軍邱狩于藪季冬甲戌天子東遊飲  
于留析射于麗虎讀書于鞠邱闕獻酒于天子乃奏廣  
樂天子遺其靈鼓乃化為黃蛇是日天子鼓道其下而  
鳴乃樹之桐以為鼓則神且鳴則利于戎以為琴則利  
闕于黃澤東遊于黃澤宿于曲洛廢闕使宮樂謠曰黃

之池其馬散沙皇人威儀黃之澤其馬散玉皇人受穀  
丙辰天子南遊于黃闕室之邱以觀夏后啓之所居乃  
闕于啓室天子筮獵革澤其卦遇訟逢公占之曰訟之  
繇數澤蒼蒼其中闕宜其正公戎事則從祭祀則憇田  
獵則獲闕飲逢公酒賜之駿馬十六締紵三十篋逢公  
再拜稽首賜筮史狐闕有陰雨夢神有事是謂重陰天  
子乃休日中大寒北風雨雪有凍人天子作詩三章以  
哀民曰我徂黃竹闕闕負悶寒帝收九行嗟我公侯百辟

冢卿皇我萬民旦夕勿忘我徂黃竹闕員閔寒帝狀九  
行嗟我公侯百辟冢卿皇我萬民旦夕勿窮有皎者駘  
翩翩其飛嗟我公侯闕勿則遷居樂甚寡不如遷土禮  
樂其民天子曰余一人則淫不皇萬民闕登乃宿于黃  
竹天子夢羿射于塗山祭公占之疏闕之闕乃宿于曲  
山壬申天子西升于曲山闕天子西征升九阿南宿于  
丹黃戊寅天子西升于陽闕過于靈闕井公博乃駕鹿  
以遊于山上為之石主而闕寘軫乃次于涇水之陽吉

日丁亥天子入于南鄭之虛皇帝之間乃闕先王九觀  
以詔後世己巳天子闕征舍于蒞臺辛未紉蒞之獸於  
是白鹿一牯棄逸出走天子乘渠黃之乘闕焉天子丘  
之是曰五鹿官人之闕是丘闕其皮是曰闕皮其脯是  
曰闕脯天子飲于漂水之上官人膳鹿獻之天子天子  
美之是曰甘癸酉天子南祭白鹿于漂闕乃西飲於草  
中大奏廣樂是曰樂人甲戌天子西北闕姬姓也盛栢  
之子也天子賜之上姬之長是曰盛門天子乃為之臺

是曰重璧之臺戊寅天子東徂于澤中逢寒疾天子舍于澤中  
盛姬告病天子憐之闕澤曰寒氏盛姬求飲天子命人取漿而  
給是曰壺輻天子西至于重璧之臺盛姬告病闕天子哀之是  
曰哀次天子乃殯盛姬于穀丘之廟壬寅天子命哭啓為主祭  
父賓喪天子王女叔姓為主天子闕賓之命終哀禮於是殤祀  
而哭內使執策官人闕丁職曾祝敷筵席設几盛饋具肺鹽羹  
截脯棗醯醢魚腊糗韭百物乃陳腥俎十二乾豆九十鼎敦壺  
尊四十器曾祝祭食進肺鹽祭酒乃獻喪主伊扈伊扈拜受闕



祭女又獻女主叔姪叔姪拜受祭闕祝報祭觴大師乃哭即位  
畢哭內史闕策而哭曾祝捧饋而哭御者闕祈而哭抗者觴夕  
而哭佐者承斗而哭佐者衣裳佩闕而哭樂闕人陳琴瑟闕竽  
籥箛篪而哭百闕衆官人各闕其職事以哭曰士女錯踊九闕  
乃終喪主伊扈哭出造舍父兄宗姪及在位者從之佐者哭且  
撤饋及壺鼎俎豆衆官人各闕其職皆哭而出并利闕事後出  
而收癸卯大哭殤祀而載甲辰天子南葬盛姬於樂池之南天  
子乃命盛姬闕之喪視皇后之葬法亦不邦後于諸侯河濟之

間共事韋穀黃城三邦之士輦喪七萃之士抗者即車曾祝先  
喪大匠御棺日月之旗七星之文鼓鐘以葬龍旗以闕鳥以建  
鼓獸以建鐘龍以建旗曰喪之先後及哭踊者之間畢有鐘旗  
闕百物喪器并利典之列于喪行靡有不備擊鼓以行喪舉  
旗以勸之擊鐘以止哭彌旗以節之曰闕祀大哭九而終喪  
出于門喪主即位周室父兄子孫倍之諸侯屬子王吏倍之  
外官王屬七萃之士倍之姬姓子弟倍之執職之人倍之百  
官衆人倍之哭者七倍之踊者三十行行萃百入女主即位

嬖人羣女倍之王臣姬姓之女倍之宮官人倍之宮賢庶妾  
倍之哭者五倍踊者次從曰天子命喪一里而擊鐘止哭曰  
匠人哭于車上曾祝哭于喪前七萃之士哭于喪所曰小哭  
錯踊三踊而行五里而次曰喪三舍至于哀次五舍至于重  
璧之臺乃休天子乃周姑繇之水以園喪車是曰圓車曰殤  
祀之孟冬辛亥邢侯曹侯來弔內史將之以見天子天子告  
不豫而辭焉邢侯曹侯來弔太子太子哭出廟門以迎邢侯  
再拜勞之侯不答拜邢侯謁哭于廟太子先哭而入西向即

位內史賓侯北向而立大哭九邢侯厝踊三而止太子送邢侯  
至廟門之外邢侯遂出太子再拜送之曹侯廟弔入哭太子送  
之亦如邢侯之禮壬子天子具官見邢侯曹侯天子還返邢侯  
曹侯執見拜天子之武一天子見之乃遣邢侯曹侯歸于其邦  
王官執禮共于二侯如故曰天子出憲以或襪賵癸丑大哭而  
闕甲寅殤祀大哭而行喪五舍于大次曰喪三日于大次殤祀  
如初辛酉大成百物皆備壬戌葬史錄繇鼓鐘以赤下棺七萃  
之士闕士女錯踊九闕空下味爽天子使嬖人贈用文錦明衣

九領寧宗伊扈贈用變裳女主叔姓贈用茵組百嬖人官師畢  
贈井利乃藏報哭于大次祥祠闕祀寧罷哭辭于遠人為盛姬  
謚曰哀淑人天子丘人是曰淑人之丘乙丑天子東征舍于五  
鹿叔姓思哭是曰女姓之丘丁卯天子東征釣于漯水以祭淑  
人是曰祭丘己巳天子東征食馬于漯水之上乃鼓之棘是曰馬  
主癸酉天子南征至于道臺仲冬甲戌天子西征至于因  
氏天子乃釣于河以觀姑繇之木丁丑天子北征戊寅舍于  
河上乃致父兄子弟王臣姬闕祥祀畢哭終寧于囂氏己卯

天子西濟于河囂氏之遂庚辰舍于茅尺於是禋祀除  
絜始樂素服而歸是曰素氏天子遂西南癸未至于野  
王甲申天子北升于大北之陞而降休于兩栢之下天  
子永念傷心乃思淑人盛姬於是流涕七萃之士萇豫  
上諫于天子曰自古有死有生豈獨淑人天子不樂出  
于永思永思有益莫忘其新天子哀之乃又流涕是日  
輟己未乙酉天子西絕鉏陞乃遂西南戊子至于監己  
丑天子南登于薄山寘軫之陞乃宿于虞庚申天子南

征吉日辛卯天子入于南鄭

注略云馬居焉知之平鄭人疑皆國名鄭音巨肯切

柏爵絮名古伯字多以木井利穆王嬖臣陽紆音陽嘔無夷馮夷也山海經云水夷河宗主河者因以為氏柏天字鄒父祭公謀父梁固梁門大夫習一名埏亦謂大圭音忽曾重也傳曰曾臣偃春山海經音鍾賜語晦者月終為晦言賜女受終福天子之珪至皆致河典河圖辭也郊父正公名○膜畫人名壽古疇字居慮人名丌亦烏人名戲曹奴人名逢固周大夫長肱國在赤海東潛時人名温歸剗閭氏人名無鳧鷄韓氏人名○王母吟於鵲讀曰烏鵲高奔戎七萃士名旁柏疑猶鄭伯命懷畧余人名諸軒亦人名音捷○濁絲氏骨軒氏重醜氏疑皆外國駮蠶重醜人名並未注玲瓏无瓏皆玉名玲瓏音鈴質黃水一作黃木畢矩王臣名歸遺丈山人名繭疑驛字麓古驥字俄古義字箇箇音秦丙參伯並御人名繭奴巨蒐人名漿洩疑是渠搜國明后君也孔

牙人名毛班即後毛伯○留昆陵崔畢並國名陵崔隗  
姓蜀胡人名咎氏猶舅氏爾天疑詩頌昊天南山有皐  
疑小雅南山有臺祭公以此規諫而王奮之也非公邴  
人名孟愈周臣名霍侯名舊黃澤謚黃之池一作黃之  
陀逢公史狐並卜人黃竹詩第三章自侯以下似當云  
百辟冢卿皇我萬民闕勿則運○盛柏姬姓國叔姓叔  
姓穆王女昔癘痊伊扈人名因氏  
國名萇豫士名鹽音古河東鹽池

### 壇山石刻

贊皇縣壇山上周穆王刻石四字筆力  
道勁有劔拔弩張之狀至宋慶厯中宋

尚書祁在鎮陽嘗摹此字見歐陽公集古錄而  
趙明誠金石錄謂穆王時所用皆古文科斗書  
此字反類小篆疑其非真我朝宋學士濂摹刻  
浦陽山房自為跋謂與周淮父自伯碩父鼎齊  
侯鐫鐘諸款識合又謂字  
形多類石鼓詳金薤琳瑯



吉日癸巳

姜后卜兆辭

汲冢師春周穆王姜后孕越姬嬖竊而育之號以玄鳥二七塗以歲血王

發書而卜之兆于是王問諸史豹曰蟲飛集戶是曰失所惟彼小人弗克以育君子史良曰是謂闕觀將留其身歸于母氏而後獲寧冊而藏之殿休將振居三月越姬死七日而復言其情曰爾夷糝也胡竊君之子不歸將寘而大戮及王子于治

蜉蝣之羽飛集于戶鴻之戾止弟弗克理重靈降誅尚

復其所

宣王

名靖穆王子在位四十六年為周中興之主

# 石鼓文

古文苑周宣王狩于岐陽所刻石鼓文十篇馮惟訥詩紀云古文苑所載石鼓文十

孫巨源得於佛書龕中蓋唐人所錄僅四百九

十七言耳章樵為之考正集釋又薛尚功鄭樵

潘迪諸家咸有音訓然于闕文靡所增益楊慎

用修自言受學李文正公得蘇文忠舊本蓋六

百五十七言訓釋簡要楊子易以今文傳之矣

陝西志與楊本同而字畫訓釋頗異今以二本

參較著之古文苑舊註有可采者間取附入註

中姓氏薛鄭章潘已見前施謂宿王王厚之蘇

疑即文忠也○鼎按歐陽文忠集古錄於此有

三疑大略謂自宣王至宋千有九百餘年理難

得存鄭漁仲謂是秦篆因其以毆為也見於秦

斤以丞為丞見于秦權其文有曰嗣王有曰天

子天子可為帝亦可謂王秦自惠文稱王始皇

稱帝以為惠文之後始皇之前所作也溫彥威

使三京以為後周文帝獵于岐陽所作蓋因史  
 大統十一年西狩岐陽之語而云也宋王厚之  
 及國初趙古則皆力辨其非斷以為宣王之時  
 史籀之書詳見古文苑金薤琳瑯然皆謂詩耳  
 楊用修風雅逸篇云石鼓詩周宣王獵碣也於  
 詩體屬小雅或以為成王時詩以左傳成有岐  
 陽之蒐證之亦一說也馮氏亦載詩紀鼎以文  
 苑載首秦詛楚諸文不列于詩而金薤原止錄  
 文此篇仍載今姑存之鼓在北京  
 國子監廟門下字多漫滅不可搨

### 音釋

避 本音吾 讀作我 車既王 籀文工 讀作攻 避馬既同避車既攷 古文 好 避

馬既駢 音阜與駢同 野良馬也 一音寶 君子鼎鼎 籀文 員通



從可 恐非 𧄸 與 𧄸 同 詩 南 有 嘉 魚 𧄸 𧄸 籀 文 皮 𧄸 𧄸 古 文 苑 作 然 旱 旱 鄭 作 𧄸 見 秦 權 𧄸 讀 作 彼 𧄸 𧄸 渾 楊 作 潮

淵 𧄸 古 文 𧄸 處 上 聲 叶 出 君 子 𧄸 𧄸 出 瀟 瀟 𧄸 通 又 通

有 下 皆 同 𧄸 古 漢 字 其 旂 游 趨 趨 音 散 叶 𧄸 讀 作 白 𧄸 魚 𧄸

𧄸 音 洛 其 𧄸 𧄸 與 𧄸 𧄸 古 作 𧄸 𧄸 鮮 黃 𧄸 其 𧄸 𧄸 古 文 又 𧄸 今

𧄸 又 𧄸 即 白 字 𧄸 志 云 其 胡 𧄸 及 孔 戾 𧄸 𧄸 出 𧄸 𧄸

音 決 獸 似 狝 狝 下 當 从 夫 楊 从 史 注 云 生 翼 反 𧄸 𧄸 籀 文 𧄸 𧄸 音 𧄸 其 𧄸 佳 𧄸 讀 作 惟 古

文 省 下 可 讀 作 何 亦 古 佳 𧄸 似 呂 佳 𧄸 可 呂 𧄸 普 刀 反 隸 作 𧄸

又 作 案 出 佳 楊 及 柳 古 文 柳

右二

薛作戊文

鄭作甲文

文六十一

施云石鼓中唯此完好無一字磨滅然字多假借世既邈遠不能盡知故義亦有不通處

更侯博雅君子辨而釋之庶可補雅頌之亡逸

田車孔

章作既

安鑿

音條鑿首垂銅也

勒駢駢

駢與駢同馬行也

六帶

古文

師既簡左驂播旂

妨圓反旌旗總名播播取其輕舉貌

右驂驥驥

紀偃反壯健兒

避吕陞

古作躋

弓邊

古原字

避戎止

石本作世

阮

古文陸

宮車其寫

寫舍也讀如卸史記秦每破諸侯寫放其宮室

秀弓

秀通作繡繡弓戎弓也教梁傳弓繡質

寺弋

射時麋豕孔戾麀鹿雉免其邊又有

牂

旃或作連音循

其戎齽齽

音奔又作走音奏鄭本有齒  
字在大字上音通古直字也

大車出各

洛亞

古文

獸

楊

亞獸白臭  
古文澤白  
澤獸名

避軌而勿攷

叶音

多虞趨趨

音力叶音約

君子道

音乃楊  
作攸

樂

音洛

右三

薛作丙文  
重文五

鄭作丁文  
共七十四字

文六十九  
一十八句

帥

帥

戾鑿車攀

音忽疾也下  
从本音叨

軟真

讀作填  
古文省

如秀弓孔

碩

叶式  
器反

彤矢哭哭

古鐵  
字

四馬其寫六

轡

沃若徒

馵

馵从馬从便舊本云  
未詳楊云恐當作駢

孔戾廊

廊

騎宣

籀文

博

古文苑作  
廊宣搏搏

齒

鄭云即齒字通作  
輔石本作省音首

車飢

古文

術

古文

如莛如章遼溼

古文濕  
通作濕  
陰陽越越  
音池調和閑習之貌鄭  
六馬馭射

缺缺  
籀文族矢鋒也叶音榭  
又  
有  
貍  
音樞  
如虎獸鹿如眾  
兕  
台  
讀作怡古

省  
文  
邇  
多賢迪  
循音  
禽叢  
奉  
雉避兔允異

右四  
薛作丁文鄭作戊文文六十九重文三共七十二字一十八句

邇來自東  
古文苑有  
霑  
古零  
雨奔楹  
古文流  
逆湧盈盈淙

與淙同音屑  
楊云水名  
溼  
古文濕  
君子既步  
古文涉  
避馬楹汧汧  
古文苑無

重  
文  
毆也  
洎  
暨  
淒  
二字古文苑俱有重文  
丞  
丞  
士駘  
古文駕  
言鹵  
古文西

邇  
籀文歸  
方  
作舫  
舟  
自廊  
廊  
徒馭  
楊作駢  
遑遑  
音  
佳  
維  
舟  
呂



術道或陰或陽極即笈字志云音結楊云音揖溪呂戶出亏水一方

密楚遑楊作止其奔避古文苑作其奔其故音禦且讀作阻古省文其直

乃吏古文

右五薛作壬文重文三鄭作辛文共六十九字文六十六

壹猷乍古文作邃乍周衛導追古造省文我我鞫籀文攸除

帥屺阪田莽舊音莽或作莽居幽切為壺里世从三十為世世三十也以三十為

世書家謂之會意非書謂之二合字並蘇合切非世字也希微微音通乃周古文

泰籀文柞音昨棫音域其拔籀文

粿籀文物別作漆水名

櫟

即榎字音宗

榕

音咎又音果

鬪鬪

未詳音義楊作庸或云遯字

鳴條

條山楸也

亞

箒

著其箒

可

何

為所斃斃

音變或作夔

水盞

音利楊音庚或音周

非

衛言

古文音

叡

樹與幽同

奇

古文音

右六

薛作庚文重文三

共五十五字鄭作乙文

文五十二

施云此鼓乃皇祐間向傳師搜訪而得者每行末僅存者四字故今所傳皆斷續不成文

徒避嘽嘽

音檀衆盛也

欬

然

而師旅

革云旅字之下磨減二字

真

填

同又

有楊云如字

繹

施云左字下有磨減字今碑本磨減

戎律

音革律徑行遽兒蘇

讀作

弓矢孔戾滔滔是戴

戴

攷夫寫矢

古文苑有不字

具隻

即

字 **非** 古文 **掌** 音自積禽也 **其徒** 音 **來或羣或**

**友** **悉率左右燕樂** 浴 **天子來嗣王始擾擾** 振音 **徬古**

**我來攸止**

**右七** 薛作甲文 鄭作壬文 文五十九

**晨** 走 **駢駢** 未詳音義 **馬麇** 即麇字音標或 **皙皙** **粵粵**

**華** **雉** 音緙似兔 **大** 舊音 **多虞** **微我師氏憲憲文武可**

**如其一出**

**右八** 薛作己文 鄭作庚文 文二十三

施云此鼓最磨  
滅不復成文

避水既澗

澗與淨同

避衛

導與作道

既兮避行既止嘉穀劓里天

子永燮

古文學

日佳

惟

丙眉

申

旭旭杲杲避其雩

籀文旁兩雅二

遼曰  
旁 衛

叶上聲

乘 乘

馬既迪

音循

殺

未詳音義章作殺

夏

古文夏

藜藜

康 駘

駘駕 辰四黃左駢駢

音教

右駢駢駢

音速 駢駢

駢

呂奔

奕

女 讀作汝

不執德

惠

旂

籀文翰平聲鳥羽也析羽而注於旗首故曰旂翰

霧

霧

音勅 焱 古焱字音標蓋通作焱楊作焱

旂

旂旗之末垂者

旒旒

音宜旗動也

公謂大

來余及如茲邑周

即宮字讀作曷何也

不余及

右九

薛作乙文  
重文七

鄭作癸文  
共八十一字

文七十四  
二十句

施云上下磨

減不成文

吳

古作

人

古文

𠄎

𠄎與

𠄎

朝

夕

警

惕

藏

𠄎

北

勿

道作

勿

若石本作

𠄎

𠄎

𠄎

奇

進

占文

用

獻

特

藝

祖

告于

大

祝

𠄎

古文

𠄎

享

致

其方

與藝同  
叶音亦

寓

逢

𠄎

籀文

孔

𠄎

𠄎

𠄎

𠄎

𠄎

𠄎

音蕃  
咸也

大

田

不

搜

君

子可

何

求

又有

謀

又

始

止于

是

右十

詳作癸文  
重文一

鄭作己文  
共七十三字

文七十二  
一十八句

今文

我車既攻我馬既同我車既好我馬既驛君子爰獵爰  
獵爰遊鹿鹿速速君子之求鬻鬻鹵弓弓茲以時我驅  
其時其來趨趨趨趨矣矣即御即時鹿鹿趨趨其來大  
盜我驅其僕其來趨趨射其豚屬

楊石鼓文序云君子  
爰獵爰獵爰游游迪

所釋牽合紕繆古人書字文同者但作二點更不複書  
迪既誤讀為君子員員邈邈員存遂復臆釋云員員衆  
多貌邈邈旌旗遠動貌  
所謂郢書燕說者也

右一

汧絜泛泛丞彼潮淵鯉鯉處之君子漁之漫漫有鯈其  
游趨趨白魚鱗鱗其蘓底鮮黃白其鱗有鮒有白其胡  
孔庶臠之夔夔洋洋趨趨其魚惟何惟鱣惟鯉何以橐  
之惟楊及柳

右二

田車孔安鑿勒駢駢六師既簡左驂翻翻右驂駛駛我  
以濟于原我戎止陸宮車其寫秀弓時射麋豕孔庶鹿

鹿雉兔其原有迪其戎奔奔大車出洛亞獸白澤我執  
而勿射多庶趨趨君子乃樂

右三

帥彼鑿車忽速填如秀弓孔碩彤矢笑笑四馬其寫六  
轡沃若徒駢孔庶廓騎宣博酋車載道如徒如章原隰  
陰陽趨趨六馬射之簇簇有羆如虎獸鹿如兕怡爾多  
賢迪禽奉雉我兔允異

右四



我來自東  
雷雨奔流  
逆湧盈盈  
滌隰君子  
既涉我馬  
流汧汧洎  
淒丞士駕  
言西歸舫  
舟自廓徒  
駢連連惟  
舟以道或  
陰或陽極  
深以戶出  
于水一方  
丞徒徨止  
其奔我以  
阻其乃事

右五

宣猷作原作周導  
造我辭攸除帥  
彼阪田莽為世  
里希微憾憾乃  
罟漆栗柞棫其  
拔櫬榕庸庸鳴  
條亞箬其華何  
為所旂  
駸駸水墊導  
旨樹幽晤

右六

徒我嘽嘽然而師旅填然會同又繹以左戎障弓矢孔  
庶滔滔是熾射夫寫矢具奪舉擘其徒肝來或羣或友  
悉率左右燕樂天子來嗣王始振振復古我來攸止

右七

彼走躡躡馬廐暫暫華華雉毘位多庶微我師氏憲憲  
文武可其一之

右八

我水既淨我道既平我行既止嘉樹則里天子永寧日  
惟丙申旭旭杲杲我其旁導乘馬既迪敵夏康康駕彼  
四黃左驂馱馱右驂馱馱戢戟以奕汝不執德藩翰黎  
黎旒旒施施公謂大來余及如茲邑曷不余及

右九

吳人憐亟朝夕倣惕載西載北勿奄勿伐若而出奇進  
獻用特歸格甄祖告于大祝禘嘗受享致其方藝寓逢  
中圓孔庶鹿鹿原隰既坦疆理蕃蕃大田不蒐君子何

求有謀有始周爰止于是

右十

襄王

諱鄭惠王子  
立三十三年

策命晉文公

晉獻楚俘于王王享醴命晉侯宥策命晉侯為  
侯伯三辭從命曰重耳敢再拜稽首奉揚天子  
之丕顯休命王子  
虎盟諸侯于王庭

王謂叔父敬服王命以綏四國糾逖王慝

左傳。史記  
云天子使王

子虎命晉侯為伯作晉文侯命王若曰父義和丕顯文  
武能慎明德昭登於上布聞在下維時上帝集厥命于

文武恤朕身繼予一人永其在位○素隱云尚書文侯之命是平王命晉文侯仇此乃襄王命文公重耳之事代數懸隔頗有踈謬

王子虎盟諸侯

皆獎王室無相害也有渝此盟明神殛之俾墜其師無克祚國及其玄孫無有老幼

靈王

名泄心簡王子立二十七年

賜齊侯命

王使劉定公賜齊靈公命將壻於齊也

昔伯舅太公右我先王股肱周室師保萬民世祚大師

以表東海王室之不壞繫伯舅是賴今余命女環茲率

舅氏之典纂乃祖考無忝乃舊敬之哉無廢朕命

靈公名環

定公名夏

景王

名貴靈王子立二十五年

追命衛襄公

襄公卒告喪于周且請命王使成簡公如衛弔且追命襄公

叔父陟恪在我先王之左右以佐事上帝余敢忘高圉

亞圉

左傳○二圉周之先也為殷諸侯亦受殷王追命

皇霸文紀卷三